

Hebiraio a zengât ekap.

Yesu zâk Anutugât topnâ sâam muyagem niŋgip.

1 ¹Anutu zâk mârurŋan Propete ziknâ topnâ dâzâŋgoi zinâ sâkurâpnîŋ den holiŋâ top topnâ dâzâŋgom gawe. ²Bet narâk murukŋan ândien zi sâi nanŋandâ diŋâ dâtnâŋgoip. Mârurŋan Anutuŋâ sâi nanŋâ hân sot kut nâi nâi aksik muyageip. Zorat nanŋâ zâk a sot kut nâi nâi zorat mariŋâ upapkât sâam pindip. ³Anutuŋâ sâi nanŋangâren zik holi tobat âsaknâ muyagem ziapkât ândiândiŋangât dâp ândimap. Oi imbaŋâ diŋandâ kut nâi nâi hânân sot sumbemân zo tângoï zemap. Zâknâ bâliŋâniŋâ saŋgon kubiknâ sumbemân zâimnâ Anutu kâwali boriboriŋoot taap, zâkkât âsan bongen zâi ândiap. ⁴Zâk sumbem a walâziŋgâm ândiap. Zâk kot patâ memnâ kutjâ sumbem a zengât walâziŋgip, ândiap.

Sumbem a zen giginâ. Nanŋâ zâk zâizâiŋ.

⁵Nanŋâ zâk zâizâiŋ ândiap. Sumbem a zen ombeŋan ândie. Sumbem a zengât mâsikâziŋgâm sâbâ. Anutuŋâ sumbem a nâi zitâ dukuiŋ?

“Gâ nannâ. Nâ itârâŋ gâsum sâlâpogoga nannâ ândiat.”

Mo sumbem a nâigât itâ sâip?

“Nâŋâ zâkkât ibâ op ândibat. Zâknâ nannâ op ândibap.”

Buŋâ. Anutuŋâ sumbem a nâigât den yatâ zo mân sâip. ⁶Ka Anutuŋâ nanŋâ kânok saŋgongui hânân gâi Anutuŋâ zâkkât den itâ sâip,

“Sumbem a zen nannâ mâpâsibi.”

⁷Anutuŋâ sumbem arâpnâ zengât itâ sâip,

“Nâŋâ sa sumbem arâpnâ pibâ upme. Oi sa ko kore arâpnâ kârâp bâlam upme.”

⁸Ka nanŋangât itâ sâip,

“Anutu, gâ a kutâ op ândim zâimâmban. Nepkâ sot imbaŋâgâ zo zinzîŋ kâtik zimbap. A kutâ tângâ zo mem târârak ândim a ambân kembu otziŋgâm ândiban. ⁹Târârakŋangât otgimap. Bâliŋâ âkon opmat, zorat Anutu, gâgât Anutu sâtâregât kelâk saŋgongigip. Zo bukurâpkâ saŋgonziŋgip, zengât dâp buŋ, walâziŋgip.”

¹⁰Anutuŋa nanŋaŋgât den ŋâi itâ sâip,

“Kembu, gâ topkwâkwatŋan hân muyagein. Oi sumbemŋa sumbemŋa muyagein. ¹¹Hân sumbem, zet buŋ upabot. Gâ ko ândim zâimâmban. Hân sumbem, zet hâmbâ yatâ sâŋgiŋa upabot. ¹²Hâmbâ yatâ sâŋgiŋa oitâ mem kâpizikâban. Kâpizikâmŋa uŋakŋa muyagezikâban. Gâ ko ândimat yatik ândim zâiban. Gâgât narâk zo mân âkâbap.”

¹³Anutuŋa sumbem a ŋâi zitâ dukoip?

“Gâ âsannâ bongen tâtna kâsarâpkâ minduziŋga kiŋgaŋgât kombân upi.”

¹⁴Sumbem a ŋâi den yatâ mân dukoip. Sumbem a zen Kembugât kore a ândie. Zen Tirik Kaapum yatâ betniŋan mimbigât sâsâŋ. Anutuŋa sumbem a sâŋgonzâŋgoi a sumbemgât siŋgi ândien, neŋgâren gam betniŋan mime.

Kubikkubik den mân birânat.

2 ¹Zorat nen den siŋgi âlip nâŋgâwen, zo tâpâkum lorem birâbemgât nâŋgâm kâtiginat. ²Anutuŋa sâi sumbem arâpŋa diŋa sâkurâpniŋ dâzâŋgowe. Oi den sâwe, zo âsagemŋa kâtik op zeip. Oi den zo birâmarâwe, zo hâuŋoot opmâip. ³Narâk ziren ko Kembu zikŋak kubikkubikninaŋgât den sâm muyageip. Oi kindapziŋandâ nâŋgâwe, zen den zo dâtnâŋgone kâtigeip. Zorat dap dabân den kubikniŋgâbapkât imbaŋa zemŋaŋgap, zo birindâ hâuŋa buŋ upap? ⁴Anutu zikŋa imbaŋa sen pup sot sen mârât muyagem den zo tângoip. Sâi Tirik Kaapumŋa nâŋgip dâp imbaŋa kâsâpkum niŋgip.

Yesu zâk narâk pânkânok sumbem a ombeziŋan ândeip.

⁵Narâk bet muyagibap, zorat sânnâ. Narâk zoren Anutuŋa a ŋâi kembuniŋa patâ kwânâŋgâbap. Sumbem a patâ op ândibigât mân sâip. ⁶Agât op sâip. Kembugât a ŋâiŋa zorat den sâm muyageip. Den zo itâ, “Anutu, gâ wangât a zeŋgât op nâŋgâmat? Agât kiurâp wangât ek galem otziŋgâmat? ⁷Zen narâk pânkânok sumbem a zeŋgât gigiŋa ândibigât sâm ziŋgin. Gâ a nâmbutŋa zeŋgât mâteziŋan imbaŋa ziŋgâna hurat kwatziŋgâme. ⁸Gâ kut ŋâi ŋâi aksik bitziŋan zâmbarin. Zorat zen mâirâp op ândibi.”

Anutu zâk kut ŋâi ŋâi a bitziŋan zâmbariŋ, zo mân kâsâpkum pisuk pirâziŋgip. Narâk ziren ko kut ŋâi ŋâi aksik patâ a neŋgât bitniŋan pâip, zo mân âsagei iksen. ⁹Yesu ko a kembu op ândei iksen. Zâk narâk mâik ŋâi sumbem a zeŋgât ombeziŋan ândim sâknam nâŋgâm moip. Sâknam nâŋgâm moipkât neule âsakŋa sot kot patâ miap. Anutu zâk tânnâŋgobapkât sâi Yesuŋa a pisuk neŋgât op mumuŋaŋgât sâknam patâ nâŋgip.

Yesu zâk neŋgât murâpnâ sâbam nâŋgi mân kwakmak oip.

¹⁰Kut ŋâi ŋâi zo zâkŋâ muyageip sot galem opmap. Zâk nan bârarâp doŋbep sumbem âsakŋan diiniŋgâm zâibapkât nâŋgâm ândeip. Oi kubikkubikniŋaŋgât a patâ, Yesu, zâk sâknam nâŋgâm moipkât kubikkubik a bonŋâ ândibapkât Ibâŋâ nâŋgi âlip oip. Nâŋgi dâp oip. ¹¹Oi a um hâlâlû kwatziŋgâmap, Yesu, zâk sot um hâlâlû kwatziŋgi ândie, zen ârândâŋ Ibâziŋ kânok. Zorat zikŋâ murâpnâ sâbat sâm nâŋgi mân kwakmak oip. ¹²Zorat diŋâ itâ ziap,

“Anutu, gâgât kutsiŋgigâ murâpnâ sâm muyageziŋgâbat. Kembugât kâmut osetziŋan kep mem sâm sâtâre otgibat.”

¹³Oi den ŋâi itâ ziap,

“Anutu nâŋgâm pâlâtâŋ kwâkŋaŋgâm ândibat.”

Oi den ŋâi itâ ziap,

“Zi nâ sot Anutuŋâ katep nigip, nen ârândâŋ ândien.”

Yesu zâk neŋgât tobat oipkât âlip betniŋan mimbap.

¹⁴Oi katep nen sip kelâkniŋoorâk ândiengât Yesu zâk zorik meip. Zo zikŋâ mumuŋandâ mumuŋâ mariŋâ, Satangât imbaŋâ koi geip. ¹⁵A zo, ziŋ munat sâm keŋgât op ândine Satangâ tâkŋâ saaziŋgi narâk dâp mumuŋaŋgât keŋgât op tâpmarâwe, zen olaŋziŋgâbam yatâ oip. ¹⁶Yesu zâkŋâ sumbem a betziŋan mimbam mân geip. Zâk Abaramgât kiurâpŋâ nen betniŋan mimbam geip. ¹⁷Oi zorat murâpŋâ nen sot dâp kânok upapkât Anutuŋâ zâk sâm pindip. Zâk yatâ opŋâ a patâ op Anutu mâteŋan kore okŋaŋgâm a ambân tânnâŋgom niŋaŋgât bâliŋâ saŋgonbapkât sâm pindi yatâ oip. ¹⁸Yesu zâk zikŋak sâknam nâŋgâm mâsimâsikâyân bageipkât a mâsimâsikâ muyageniŋgi âlip betniŋan mimbap.

Yesu zâk patâ. Mose zâk ombegan.

3 ¹Zorat op ko Kembugât siŋgiyân a bukurâpnâ sumbengât siŋgi ârândâŋ diiniŋgip, zen Yesugât nâŋgâm ândibi. Yesu zâk Aposolo op Anutu kore okŋaŋgâm ândimap. Ândei niŋâ nâŋgâm pâlâtâŋ kwâkŋaŋgindâ zâkŋâ patâniŋâ op ândiap. ²Anutuŋâ gâsum sâlâpkoi sât luluŋ ândeip. Mose zâk Anutugât a ambân gakârâpŋâ osetziŋan sât lulu ândeip. Oi Yesu zâk zo yatik ândeip.

³Mirâ tuumap, zâkkât kotŋâ mirâgât siŋgi walâmap dâp yatik Yesugât kutsiŋgiŋâ Mosegât wâlap. ⁴(Mirâ mot zo aŋâ tuutuŋâ. Ka kut ŋâi ŋâi muyamuyagiŋâ, zo mariŋ Anutu kânok.) ⁵Mose zâk Anutugât a ambân gakârâpŋâ zengât osetziŋan ândim kore a op sât luluŋ nep tuum ândeip. Zâk bet den sâi muyagibapkât op kore op ândeip. ⁶Kristo ko nanŋandâ Anutu a ambân gakârâpŋâ neŋgât kâukniŋâ ândiap. Zâk Ibâŋaŋgât sât

luluŋ ândiap. Oi nen sumbemgât siŋgi kwatniŋgip, zorat nâŋgâm um bâbâlaŋ op âinatkat mambât ândinat oi ko zâkkât a ambân gakârâpnâ bonŋa op ândinat.

Isirae a um kâtik urâwe, zo yatâ mân utnat.

⁷⁻⁸Zorat Tirik Kaapumŋa Kembangât den itâ sâip. Zo nengât siŋgi sâip, “Zen itârâŋ Anutugât diŋa nâŋgâm mârumŋan sâkurâpziŋa um kâtik urâwe, zo yatik mân upi. Sâkurâpziŋa mirâ kamân kâtikŋan ândine mâsimâsikâŋ muyagei um kâlagân laŋ urâwe. ⁹Sâkurâpziŋ hân zoren kut ŋâi ŋâi orâwan, zo kendon 40 umŋan ek ândiwe. Ekŋa umziŋ mân âburei laŋ zâizâiŋ otnim mâsikâniwe. ¹⁰Oi nâ zorat nâŋga bâliŋ oi zengât itâ sâwan, ‘Zen umziŋandâ gulip op gâmap. Zen nâgât mâtâp mân lâŋme.’ ¹¹Yatâ op ândine kuk otziŋgâm itâ sâwan, ‘Zen nâgât ândim nâŋga kamânân mânâk bagibi.’”

¹²Bukurâpnâ, zengâren gâbâ ŋâi zâk um kâtik op um sumun op Anutu kândâtkobapkât galem oraŋgâm ândibi. ¹³Itârâŋ Kembangât diŋa nâŋgâmŋa mân birâbi sâip. Itârâŋ sâip, zo narâk zirat op sâip. Zorat sirâmŋa sirâmŋa umziŋandâ kâitzâŋgobapkât den sâm galem oraŋgâm ândibi. Bâliŋangât mâsimâsikâŋa zengâren gâbâ a ŋâi okŋaŋgi um gulip otziŋgâbapkât op sâip.

Isirae a zengât siŋgi nâŋgâm kengât utnat.

¹⁴Nen Kristo nâŋgâm pâlâtâŋ kwâkŋaŋgâm kâtigem ândinat. Oi topkwap nâŋgâm pâlâtâŋ kwarâwen, zo âsâbâŋ mem ândimŋa kikerân âi takâm Kristo sot bonŋa minat. ¹⁵Kembangât ekabân den ŋâi itâ ziap, “Zen itârâŋ Anutugât diŋa nâŋgâm zâizâiŋ op um kâtik urâwe, zo yatik mân upi.”

¹⁶A ikâ ziŋa diŋa nâŋgâm tâtâlim um kâlak muyagiwe? Zo ŋâin gokŋandâ buŋa. Mosenâ kândom otziŋgi Aigita hânân gâbâ diiziŋgip, a zo aksik ziŋa. ¹⁷Mo a ikâ zengât Anutuŋa nâŋgi sumunkoi kendon 40 âkip? Zo bâliŋa op ândim mirâ kamân kâtikŋan mom naŋgawe, zengât op yatâ oip. ¹⁸Oi ikâ ziŋa zengât itâ sâm kâtigeip, “Nâgât ândim nâŋga kamânân mân âibi?” Diŋa birâm ândiwe zo, zengât op sâip. ¹⁹Zorat itâ nâŋgâmen. Zen mân nâŋgâm pâlâtâŋ kwarâwe, zorat ândim nâŋga kamânân mân âiwe.

Ândim nâŋga kâmânân takânatkat sâm niŋgip.

4 ¹Ândim nâŋga kamânŋan âinat sâsâŋa. Siŋgi den zo mân gulipkoi buŋ oip. Zorat nengâren gâbâ ŋâiŋa mâtâbân gulip opapkât um girem utnat. ²Siŋgi âlip den sâkurâpniŋa dâzâŋgowe, zo yatik nen dâtnâŋgowe. Ka sâkurâpniŋa zen den zo nâŋgâm umziŋan mân pane zeipkât zengâren bon buŋ oip.

³ Siŋgi âlip nângâm umniŋan pamen, nen ko ândim nângâ kamânân bagimen. Anutuŋâ sâkurâpniŋangât itâ sâip,

“Nâ kuk otziŋgâm itâ sâm kâtigiwan, “Zen nâgât ândim nângâ kamânân mân bagibi. Zen nâ sot ândim nângâ mân upi.”

⁴ Anutu zâk narâk zoren yatâ sâip. Ka mârumŋan hân mot muyageip, narâk zoren Anutuŋâ nepŋâ tuum kwâkâm kendon tap nângip. Anutuŋâ sirâm nâmburân kânok umŋan a sot kut ŋâi muyageziŋgip. Sirâm nâmburân zagât, zorat Kembugât ekabân den ŋâi itâ ziap,

“Anutu, zâk kut ŋâi ŋâi muyagem nângâm sirâm nâmburân zagât, zoren kendon tap nângip.”

⁵ Oi bet Isirae a mirâ kamân kâtikŋan um kâtik ândine Anutuŋâ den ŋâi u ziap, zo yatik zeŋgât op itâ sâip,

“Zen nâgât ândim nângâ kamânân mân bagibi.”

⁶ Mârum ândiwe, zen siŋgi âlip nângâm diŋâ birâm mân bagiwe. Ka a nâmbutŋandâ ândim nângâyân bagibigât mâtâp ziap. ⁷ Wangât, bet narâk ŋâin Anutuŋâ narâkŋâ du sâip. A kutâ Dawidigât lâuyan den san, zo pâi itâ sâip,

“Zen itârâŋ diŋâ nângâme oi ko um kâtik mân ândibi.”

⁸ Zorat op ko Yosua zâk mârum ândim nângâ kamân bonŋâ muyagem ziŋgi sâi bet Anutuŋâ narâkŋangât dum mân sâbap. ⁹ Zorat itâ nângâbi, “Anutu hân mot muyagem nângâmŋâ kendon tap nângip, zo yatik Anutugât a ambân neŋgât ândim nângâ kendon ŋâi tok ziap. ¹⁰ Anutu zâk nep tuum nângâm ândim nângip, zo yatik a niŋâ Anutugât ândim nângâyân baginatŋâ nep birâm ândim nângânat.”

Anutu diŋangât topŋâ.

¹¹ Oi niŋan gâbâ ŋâiŋâ lorem Isirae a mârum mâtâp bâliŋ lâŋawe, zorik lâŋbapkât ândim nângâ kamânân âinatkat kâtiginat.

¹² Anutugât den, zo ândiândiŋâ sot imbanâŋoot. Oi sâu ŋâi umŋâ kândâtŋâ sâtŋoot zorat dâp walâm sât kâtik zo nem giari umniŋâ sot um dâpniŋâ zo nem mânângâtmap. Oi um nângânângâniŋâ sot umŋâ nângâm kubikkubik zorat topŋâ muyagibapkât sâsâŋ. ¹³ Kut ŋâi ŋâi, zo aksik muyagemap. ŋâiŋâ Anutugât mâteŋan tik mân zemap. Zâkkâren kut ŋâi ŋâi muyap sot ekap buŋ zemap.

Patâniŋâ Yesu um bâbâlanŋ op mâte okŋangânat.

¹⁴ Anutugât tirik namâ galem a patâ ŋâi ândiniŋap. Anutugât nanŋâ Yesu. Zâk sumbem walâm zâi ândiap. Zâk zo yatâ ândiapkât Kembu patâniŋâ sâm nângâm pâlâtâŋ kwâkŋangâm ândinat. ¹⁵ Oi tirik namâ galem a patâniŋâ zâk loreindâ nângâniŋâm mân nângânângâ mân opmap. Neŋgâren mâsimâsikâ muyagemap, zo yatik mârum zâkkâren mâsimâsikâ top top muyageip. Oi zâk bâliŋâ mân oip. ¹⁶ Zorat nen um

bâbâlaŋ op zâkkâren arindâ tânnâŋgomâmbap. Oi kut ŋâi zo mo zo mâte otniŋgi zâkkâren arindâ umâlipŋangât op tânnâŋgobap.

**Yesu zâk sâknam nep tuugipkât Anutuŋâ tirik
namâ galem a patâ kwânâŋgip.**

5 ¹Hânân nenŋâren Anutugât tirik namâ galem a gâsum sâlâpzânŋoip zo, zen a zengât opŋâ Anutu mâteŋan muyagem a zengât tosaŋât bâu mot Kembugât ŋiŋgi sâam kom umbigât zâambarip. ²Tirik namâ galem a yatâ zo, zâk zikŋak a lotŋâ ândiapkât kwakmak a sot gulip ândiândiŋ zo âlip mulun kwatziŋgâbap. ³Topŋâ yatâgât a zengât tosa sot zikŋâ tosa ârândân Kembugât ŋiŋgi nalem umbapkât sâsânâ.

⁴Nep zâizâiŋ zo a ŋâi zik umgât mân tuubap. A ŋâi Anutuŋâ gâsum sâlâpkum nep diŋ sâam pindip, a zo zâkŋak tuubap. Anutuŋâ Aaronŋ yatâ gâsum sâlâpkuip.

⁵Oi Kristo zâk zo yatik zik umgât nânŋgi zari tirik namâ galem a patâ mân oip. Zo Anutuŋâ gâsum sâlâpkumŋâ itâ sâam nep diŋ sâam pindip, “Gâ nannâ. Nâ irak zi gâsum sâlâpgoga nannâ ândiat.”

⁶Oi den itâ sâip,

“Gâ Melkisidek zâk yatâ tirik namâ galem a ândim zâiban.”

⁷Yesu zâk hânân ândeip, narâk zoren umbâlâ patâ op isemŋâ mumuŋan gâbâ mâkâbapkât imbanâ zemŋangip, Anutu Ibâ, zâkkâren ninâu sâip. Oi Yesu zâk Anutu hurat kwâkŋangipkât Anutuŋâ nânŋgânŋangip. ⁸Yesu zâk nanŋâ ândeip oi laŋ sâknam nep tuum âim sat lulu topŋâ nânŋip. ⁹Kut ŋâi ŋâi op nanŋipŋâ sât lulu a ambân zen kubikziŋgi ândiândi kâtik ândim zâimambi. ¹⁰Zâk tirik namâ galem a patâ oip. Melkisidek, zâk mârumŋan Kembugât ŋiŋgi nalem om kore okŋangâm ândeip. Yesu zâkkât dâp ândibapkât Anutuŋâ sâam pindip.

Katep zengât nânŋânŋgâ yatâ mân ândibi.

¹¹Zorat den doŋbep ziap. Oi zen kindapziŋ kâmbâk ândiegât dâzânŋobat, zorat nânŋa yâmbâriap. ¹²Zen narâk kârep ŋiŋgi âlip nânŋâm gawe. Zorat op ko zen ŋiŋgi âlibân lâmbatŋâ a nâmbutŋâ kwâkâm ziŋgâne dâp opap. Ka zen ŋiŋgi âlibân mân lâmbatse. Zen yatâ zo ŋiŋgi âlipkât den mâteŋâ kwâkâm ziŋgâbigât dâp ue. Zen nalem kâtikŋangât dâp buŋâ. Zen nam nânegârâk ândie. ¹³Nam nime, zen katep sânat. Yatâ zorânâ dap op den bonŋâ zorat topŋâ sâlâpkum nânŋâbi. ¹⁴Nalem kâtikŋâ zo lâmbarâwe zengât ŋiŋgi. Um nânŋânŋgâziŋ muyagei âlipŋâ sot bâliŋâ nânŋâm kâsâpkume, zengât ŋiŋgi.

Anutu birânŋangâm um melânŋmelân, zo mân taap.

6 ¹Zorat nen Kristogât den mâteŋâ zo birindâ zei den yâmbâtŋâ zo târokwap sânat. Kembugât den top kwâkwatŋâ zo birânat. Zo

itâ. Um melânjmelânj sot ândiândi sânginjâ bon buj zo birâbirânj sot Anutu nânġâm pâlâtânj kwâkwat. ²Yesugât korân yatâ mo yatâ too sanġonzingâzingânj sot bet kâugân pâpan sot mumuġan gâbâ zaatzaat sot narâk patin hâuġâ minat, zorat den. ³Anutuġâ nânġânġi den nâmbutġâ târokwatnâ.

⁴A sġi ħlip den mem umziġ pâi âsakġan âsagemap sot sumbemân gâbâ umġât gom sambe zorat den nânġâm âkġâliwe sot Tirik Kaapum sot urâwe. ⁵Oi Anutuġât den zorat nânġâne ħlip oi narâk patâġât imbanġâ zo nânġâm âkġâliwe. ⁶A yatâ zo sġi ħlip kândâtkom Anutuġât nanġâ du poruyân kumbe yatâ upap. Zen yatâ utne a nâmbutġâ ziġâ Yesugât nânġâm bâliġ kwapme. A yatâ zo dap op umziġ melân sġi ħlibân ga gibi?

⁷Zorat den sumbuġâ ġâi sa nânġâneġ. Hân ġâi mapġâ âsâbânj ġâi hân sâduksâi a kârâm kâmitme zeġġât naleġ muyagemap. ⁸Ka hân zorenâk ħibuk bâliġik muyagemap, zo bon buġanġât Anutuġâ sâġ bâliġ koi kârâpġâ simbap.

Kwik târarak kinkinġanġât diġâ.

⁹Bukurâpnâ, nâ den yatâ san, zo tâmbetagoġigât buġâ. Zen sġi ħlibân kubikkubik op ħlip upigât yatâ nânġâm san. ¹⁰Anutu zâk gulip orot buġâ. Zen zâkkât opġâ arâpġâ betziġan mem buku otziġġawe. Oi upme, zorat dap yatâ nelâmkubap? Buġâ. ¹¹Zen itâ upigât otnigap. Zen aksik patâ sġi ħlibân kâtigem sumbemân âibigât um bâbâlanj op mambât ândine narâk âkâbap. ¹²Oi mân lorem sġi ħlip a nânġâm pâlâtânj sot kâtigem ândim kut ġâi ġâi neġġât sġi sâip, zo galem upme, zo zeġġât mâtâp lâġbi.

Sumbemġât sġi kwatniġipkât mân keġġât utnat.

¹³Anutuġâ Abaram sġi den dukum patâ ġâigât mâteġan sâġ kâtigibat sâġ kârurnġâ zikġan kwap sâġ kâtigep. ¹⁴Oi itâ sâip, “Nâ perâkġak mâsop mingiga kiurâpkâ laġ kârâm ândibi.” ¹⁵Oi Abaram zâk den zorat bonġâ muyagibapkât mambât âkonġâ buġâ ândim bon muyageip.

¹⁶Anġâ a patâ ġâi zâkkât mâteġan sâġ kâtigem sâne sâġ kwâkâkwâkânj orot zo mân muyagibap. ¹⁷Zorat Anutu zâk a sġi kwatziġi um zagât ueġġât umġandâ kâtigepi sâip. Zorat topġâ muyagei sġi den zorat kwâkġan sâġ kâtik den sâġ târokwâip. ¹⁸Anutu zâk sarâ buġâ. Den zagât sġi den sot sâġ kâtik den zo kwânânġâzikâm neġġâren tâmbetagoġanġât sâi zâkkâren âiwen. Oi neġġât sġi kut ġâi sâip, zo kâtigem minatkât yatâ oip. ¹⁹Sġi kwatniġawe, zorat bonġandâ ândiândiniġanġât ândâniġ kâtikġâ, zo muyap buġâ. Oi ândâniġ zorânġâ tirik namin sâġgum umġan tik pane ziap, zoren âi ġâsum kâtigemap.

²⁰Sângumjan zo Yesuñâ kâdom otniñgâm bageip. Zâk Melkasidek zâk yatâ tirik namâ galem a op ândimapñâ yatâ oip.

Melkasidekât topñâ

7 ¹Melkasidek zâk Salem kamân zengât a kutâ. Anutu u patâ, zâkkât tirik namâ galem a op ândeip. Abaramñâ a kutâ kâsarâpñâ zângomñâ âburem gâi Melkasidekñâ mâtâbân muyagem mâsop miñangip. ²Oi Abaramñâ sikum meip, zo kâsâpkum bâzagârân gâbâ Melkasidek kânok pindip. Melkasidek zâkkât kutñâ niij denân itâ, “Târârakñâ a kutâ.” Salem a kutâ, zo niij denân itâ, “Lumberñâ a kutâ.” ³Melkasidek zâk ibâ mam zekât kutzikñâ Kembugât ekabân mân ziap, zorat topñâ mân nângâmen. Zâk sâkurâp kutziñâ ekabân mân ziap. Zâk âsaâsagiñ narâk ekabân mân ziap sot mumbapkât narâk ekabân mân ziap. Zâk Anutu nanñâ zâkkât dâp upapkât sâsâñ. Zorat narâk dâp tirik namâ galem a op ândeip.

Melkasidek zâk tirik namâ galem a nâmbutñâ ândiwe, zo walâziñgip.

⁴Zi nângânek. Melkasidek zâk a zâizâiñ ñâi. Zâkñâ sâkunniñâ Abaram walip, zorat Abaram zâk sikum âlipñâ zo kâsâpkum bâzagârân gâbâ ma kânok zo pindip. ⁵Bet Mose ândeip, zoren gâbâ Lewigât kiurâp nâmbutñâ zen tirik namâ galem upigât sâsâñâ. Zen Abaramgât kiurâp nâmbutñâ torerâpziñâ zengâren gâbâ sikum kut ñâi ñâi bâzagârân gâbâ ma kânok mem ândiwe. Zen zo yatâ upigât den ñâi Mosegât gurumin den ekabân ziap. ⁶Ka Melkasidek zâk zengât kâmurân gâbâ mân muyageip. Zâk mârumjan ândeip. Oi zâk Abaramgâren gâbâ bâzagârân gâbâ kânok meip. Anutuñâ Abaram siñgi den kwâkñangip. Abaram zâk a patâ oip. Melkasidek ko zâk a zâizâiñ ñâi op Abaram mâsop miñangip. ⁷Zorat itâ nângânek, “A zâizâiñandâ gigiñâ mâsop memap.” Den zo bonñâ. Zo ñâiñâ dap op kwâimbâbap? Zorat op ko itâ nângâmen. Melkasidekñâ Abaram walâm ândeip. ⁸Narâk zi tirik namâ a buñ orotñandâ sikum bâzagârân gâbâ ma kânok mime. Ka narâk zoren ko Melkasidek zâk ândiândi kâtik ândibapkât sâsâñ, zâkñâ sikum Abaramgâren meip. Lewi mân âsageip, narâk zoren sâkunñâ Abaramñâ sikum kâsâpkum Melkasidek pindip. ⁹Zorat op ko nâ zorat nânga itâ uap. Lewi, zâk bâzagârân gâbâ ma kânok memapñâ sâkunñâ Abaram zâk sot Melkasidek sikum zo pindip. ¹⁰Sâkunñâ Abaram mâtâbân gâi Melkasidek zâk sot kândiangâwet, narâk zoren Lewi zâk mân muyageip. Zorat itâ nângânat. Lewi zâk sâkunñangâren gok, zorat op sikum kâsâpkum bâzagârân gâbâ ma kânok Melkasidek pindip yatâ uap.

Tirik namâ galem a Lewigât kâmut, zengât nep zo mân dâp oip.

¹¹Lewigât kiurâp, Aaronñâ kâmut, ziñ tirik namâ galem upigât Moseñâ gurumin den ekabân sâm ziñgip. Lewigât kiurâpñâ zengâren tirik namâ

galem urâwe, zo âlip oi sâi wangât bet tirik namâ galem a nâi Melkasidek yatâ muyagebap? ¹²Oi tirik namâ galem a kâmut sângiñâ zo siriksâi a uñakñandâ galem upap. Yatâ oi sângiñangât den kâtik zo siriksâi uñakñâ nâi muyagibap. ¹³Anutuñâ a nâi Melkasidek yatâ upapkât sâip. Zâk Lewigât kâmurân mân muyageip. Zâk nâin gokñâ. Mârum zâkkât kâmut zo, zengâren gâbâ nâiñâ tirik namin nep mân tuubigât sâip. ¹⁴Kembuniñâ Yesu, zâk Yudagat kiurâp zengâren gâbâ muyageip, zo nângen. Oi kâmut zo, zen tirik namâ galem upigât Mosenâ den mân sâip.

¹⁵Oi zorat topñâ itâ muyagiap. Tirik namâ galem a nâi Melkasidek, zâkkât dâp muyagibapkât sâsân. ¹⁶A zo ândiândi kâtikkât imbanan tirik namâ galem op ândeipñâ ândiap. Zo sâkunziñangât den kâtik zeip, zorat dâbân buñâ. ¹⁷Oi zâkkât den Kembuñâ itâ sâm muyagei Kembugât ekabân ziap,

“Gâ Melkasidek zâk yatâ tirik namâ galem a ândim zâimâmban.”

Yesu zâk târotâro bonñangât nakñâ.

¹⁸Gurumin den sângiñâ mârum zeip, zo lolot sot bon buñâ oipkât birâbirân. ¹⁹(Den kâtik zorânâ kut nâi mân kubikñangip.) Oi zorat hâuñâ Kembuñâ mâtâp âlipñâ muyagei zorân diiningi Anutu âlip mâte okñangâmen. ²⁰Uñakñâ muyageip, zo sâm kâtik den buñ mân muyageip. ²¹Sângiñâ, zen sâm kâtik den buñâ tirik namâ galem a urâwe. Uñakñâ zi ko den kâtik kwâkñan namâ galem a op ândeip. Zâkkât den kâtik Kembugât ekabân itâ kulemgune ziap,

“Kembuñâ den sâm kâtigeip, zo mân birâbap. Zâk itâ sâip, ‘Gâ tirik namâ galem a op ândim zâimâmban, kâtikñâ.’”

²²Yatâ opñâ topñâ itâ nângânat. Yesuñâ târotâro bonñâ muyageip.

²³Tirik namâ galem a sângiñâ, zen ko doñbep, zinziñ kâtik buñâ. Zen ândim momarâwe. ²⁴Uñakñâ, zâk ko ândiândi kâtik ândibapkât tirik namâ galem nep zo tuugipkât zem zâimâmbap. ²⁵Zorat narâk dâp a Anutu mâte okñangânam Yesugâren gâindâ âlip betniñan mem tânnângomap. Zâk ândiândi kâtik ândiapkât âsâbân zengât op Anutugâren ninâu sâmap.

Yesu zâk tirik namâ galem a bonñâ.

²⁶Tirik namâ galem a patâ, zâk hâlâlu sot tosa buñ, salekñâ, bâliñ mâme a zen yatâ mân op ândiândiñ. Oi zâim hân sot sumbem walâm patâ op ândiap. Yatâ zorân nengât op Anutu mâteñan kin ândei dâp uap. ²⁷Zâk tirik namâ galem a sângiñâ yatâ buñâ. Sângiñâ, zen sirâmñâ sirâmñâ ziñâ bâliñangât opñâ Kembugât sñgi nalem omarâwe. Omñâ bet a ambân zengât op omarâwe. Kristo ko nengât op sâp kânok Kembugât sñgi sâm ândiândiñâ pâi âkip. ²⁸Mosegât den kâtik ekabân a yenñâ, umziñ lolotñâ, zen tirik namâ galem a patâ ândibigât den ziap.

Bet ko Anutuŋa nanŋa tirik namâ galem a patâ op târârak sot hâlâlu op ândim zâimâmbakât gâsum sâlâpkum sâm kâtigeip.

Yesu zâk u sumbemân tirik namin nep tuumap.

8 ¹Den zorat keetŋa itâ. Tirik namâ galem a patâniŋa ândiap. Zâk u sumbemân, imbanŋa mariŋa, zâkkât âsan bongen zarip. ²Zâk hâlâlu namâ bonŋa zorat galem a pata ândiap. Namâ zo anŋa buŋa, Kembu zikŋak muyageip.

³Hânân tirik namâ galem a patâ zen Kembugât sii nalem umbigât sâm zingip. Zorat tirik namâ galem a patâniŋa Yesu, zâk dâp op Kembugât siŋgi kut nâi pâmbakât sâsân. ⁴(Hânân den kâtik ziap, zorat dâp Kembugât siŋgi nalem uuŋ ândie.) Oi Yesu zâk hânân ândim sâi namâ galem a patâ mân ândibat. ⁵Hânân a zen nepziŋa tirik namâ yenŋa sot dâp zoren upme. Bonŋa ko sumbemân taap. Mose, zâk hâmbâ silep tuubam oi Kembuŋa itâ sâm dukuip, “Nâŋgat. Dâp bâkŋan tirâpgowan, zo yatigâk silep mot zo tuuban.”

Târotâro uŋakŋangât den.

⁶Kristonŋa târotâro bonŋa muyageip, zorân sâŋgiŋa wâlap. Zo yatigâk tirik namin nep tuumap, zorân sâŋgiŋa wâlap. Târotâro uŋakŋan kut nâi nâi Anutuŋa nenŋat siŋgi sâip, zorân sâŋgiŋa wâlap. ⁷Mârum târotâro sâŋgiŋa zeip, zorân bon oi sâi bet nâi muyagibakât diŋa mân âsagebap.

⁸Anutu zâk a zenŋat nânŋi mân dâp oi itâ sâip,

“Gâtâm narâk nâin Isirae a kâmut sot Yuda a kâmut, zen sot târotâro uŋakŋa nâi muyagibat. ⁹Mârum sâkurâpziŋa Aigita hânân gâbâ diizingâm gam bitziŋan gâsum zen sot târotâro orâwan. Târotâro uŋakŋa ko târotâro sâŋgiŋa zo yatâ buŋa. Mârumŋan târotâro zo mân lune nâ kândâtzâŋgowan.”

¹⁰Oi Kembuŋa itâ târokwap sâip.

“Bet Isirae a zen sot târotâro upat, zo ko itâ. Nâ den kâtiknâ umziŋan pa geibap. Oi umziŋ kâligen kulemgua zimbap. Oi nâ zenŋat Anutu ândibat. Oi zen kâmut gakârâpnâ ândibi. ¹¹Oi a nâiŋa a bukuŋa mo torenŋa itâ mân sâm kwâkâm pindâbap, ‘Hâiyop, gâ Kembugât topŋa nânŋâ.’ Buŋa. Zen gigiŋa sot zâizâiŋ pisuk topnâ nânŋâm kwâtâtibi. ¹²Itâgât topnâ nânŋâm kwâtâtibi. Nâ tosaziŋ birâbat. Bâliŋâziŋangât dum mân nânŋâbat.”

¹³Oi Kembu zâk târotâro uŋakŋangât den sâmŋa mârum zeip, zorat sâŋgiŋa sâm birip. Oi kut nâi sâŋgiŋa upam uap, zo mân zimbakât sâsân.

Mârum Kembu mâte okŋangâwe, zo yenŋa.

9 ¹Târotâro sâŋgiŋan Kembu mâte okŋangâbigât mâtâp zeip. Oi zorat Kembugât hâmbâ silepŋa hânân zeip. ²Silep zo itâ tuuwe. Umŋa nâi

mâteyâk hâlâlu namâ sâwe. Zoren kârâp sisiņ zo kirip. Oi zoren tâtatņâ nâi tâip. Zorat kwâkņan Kembugât siņgi nalem hâlâlu sâsân, zo tâip. ³Umņâ nâi sâņgumņâ kom mânânġâtne zeip. Zo hâlâlu kâtikņâ sâne zeip. ⁴Zoren kâbak hitom âlip uuņâ goide kâtņâ tuutuun, zo tâip. Oi târotârogât ombonâ nakņâ tuutuun, zo sâkņan goideņâ kâpine tâip. Oi Aarongât tân kâm takâm âiyagip, zo sot âmaņ goide kâtņâ tuutuun, zorat umņan nalem kutņâ Mana, zo zeip. Oi târotârogât gurumin den kârân kulengoip, zo zeip. Kut nâi nâi zo ombon umņan ziwe. ⁵Ombon kwâkņan sumbem a dâpņâ zagât abâtzikņandâ ombon kwâkņan pam kirâwet. Osetzikņan tosaziņ buņ upapkât namâ galem aņâ bâu gilâm lokimarâwe. Ziren kut nâi nâi zorat den kârep mân sâbat.

⁶Kut nâi nâi zo kubikne zei namâ umņâ mâteyâk zoren tirik namâ galem a zen âsâbân zâim nepziņ tuumarâwe. ⁷Ka namâ umņâ nâi zoren tirik namâ galem a patâ zâk zikņik kendon patâ nâigât umņan sâp kânok zâimâip. Oi gilâm buņ mân âimâip. Bâu gilâm sorâk âim zikņâ sot a ambân zengât tosgât lokimâip. Mân nânġâm tosa muyagiwe, zo buņ upapkât yatâ opmâip. ⁸Zorat topņâ Tirik Kaapumņâ itâ tirâpnânġuap. Tirik namâ galem a ziņ umņâ mâteyâk zoren zâim nep tuum ândiwe. Narâk zoren umņâ nâi hâlâlu kâtik sâme, zorat bagibagiņangât mâtâp mân âsageip. ⁹(Den san zi den sumbuņâ. Narâk zi topņâ nânġâbigât san.) Hâmbâ silebân nalem sot zuu uuņâ, zorâņ dap op a ziņ Anutu mâte okņangâwe, zengât umziņ salekkobap? ¹⁰Zo sâkkârâk den kâtik. Nalem sot toogât sot sâk saņgon zorat den zeip, zo yatâ. Zo ziziņ kâtik mân sâsânâ. Bonņâ muyagei zo birâbirâņ.

Kristo zâk tirik namâ nep bonņâ tuugip.

¹¹Kristoņâ ko kut nâi nâi bonņâ muyagibap sâsânâ. Zorat zâkņâ tirik namâ galem a patâ muyageip. Oi hâmbâ silep tobat nâi, bonņâ, betņâ mân tuutuun, hânân mân ziap, zoren bageip. ¹²Zâk noniņ makau zengât gilâm sot buņâ. Zikņâ gilâmņâ hâlâlu namin sâp kânok bagei gilâmņandâ sâņġâniņ meip. Sâņġâniņ meipkât zâkkât siņgi urâwengât zâkkât siņgi op zâimânat. ¹³Noniņ makau zengât gilâm, zorâņ a sâkziņ salekkubapkât aam sâkziņan pane hâlâlu minziņgi Kembu mâte okņangâmarâwe. Makau kârâbân sem simbup oip, zorat kâuņâ zorâņ sâkziņan saņgori Kembu mâte okņangâmarâwe. ¹⁴Kaapumņâ ândeipņâ ândiap sot ândibap, zâk Kristo mam okņangi zâkņâ um sâkņâ salek op Anutugât siņgi sâm ândiândiņâ biri gilâmņâ geip. Oi Kristoņâ gilâmņandâ umniņ saņgorip. Nen orot mâmeniņ gukupitņandâ tuugindâ umniņ sumunkoip, zo Kristoņâ saņgori salekkoip. Gilâmņâ umniņ saņgori Anutu, ândiândi mariņâ, zâkkât kore mâman a ambân urâwen.

Kristogât gilâmņandâ kut nâi nâi sâņġân meip.

¹⁵Zorat Kristo zâk târotâro uņakņangât nakņâ oip. Târotâro sâņġiņan ândim tosa muyagiwe, zo buņ upapkât moip. Oi zorat zâkkât siņgi a zen bet sâwât, ândiândi kâtik zengât siņgi sâip, zo âlip mimi.

¹⁶ Bet sâwât-kât mâtâp itâ ziap. Mariñandâ moi ko galem upme. ¹⁷ Wâgân ândei bet sâwât den sâsân zo yen zimbap. Moi ko den zorat bonjâ muyagibap. ¹⁸ Zorat târotârô sânginjâ zo gilâm buj mân muyageip. ¹⁹ Mose zâk den kâtigân den top top minduminduyân a dâzângom nanjâm makau sot nonij gilâm too sot mâpotjâ râma sâmotjandâ zoren saam zorânjâ gilâmân kwânderjâ Kembangât ekap sot a ambân aksik patâ kwititapkoip. ²⁰ Zâk-jâ itâ dâzângoip, “Anutu-jâ târotârônjâ sâm kâtigem zingip, zorat gilâm zi.” ²¹ Yatigâk hâmbâ silep sot âmaj mot gilâm-jâ kwititapkoip sanjonzingip. ²² Zorat den kâtikjan sâsânangât kut jâi jâi âksik sanjon nanjânangân sot gilâm buj, zorân tosa guligulipkuj mân ziap.

Kristo zâk sângâninj mei dâp oip.

²³ Sumbemân kut jâi jâi bonjâ ziap. Oi zorat dâp hânân gilâm yenjandâ kut jâi jâi sanjonbapkât sâsânjâ. Uren bonjâ ko Yesu zikjâ sângânjâ patâ sanjonbapkât mâtâpjâ muyageip. ²⁴ Zorat opjâ Kristo zâk tirik namâ hânân, betjâ tuutuuj, u bonjâ zorat dâp, zoren mân bageip. Zâk u sumbemân tirik namâ bonjâ, zoren bageip. Oi zoren Anutu mâtejan ândim niijangât op nep tuumap.

²⁵ Tirik namâ galem a zen kendon dâp nonij makau kom gilâm mem zâime. Kristo zâk zo yatâ mân oip. Zâk-jâ sâp kânok um sâkjâ zo Kembangât singi sâm zâi pâip. ²⁶ Kristo zâk tirik namâ galem a nâmbutjâ zo yatâ opmâip sâi hân muyageibân gâbâ sâknam nanjâm gâbap. Zâk yatâ mân opjâ narâk murukjan zi suupnij mem tosanij gulipkubapkât muyageip. ²⁷ Ajâ kânok munatkât sâm ningip. Oi zorat kwâkjan dininjâ sâm kwâkâbapkât sâsânjâ. ²⁸ Oi Kristo zâk yatik a donjep nenjât tosanjâ kwâkjan zari sâp kânok moipjâ dum ga bâlijâ sanjonbap, zo bujâ. Zâk gâbapkât um bâbâlañ op mambât ândimen, nen minijgâbapkât gâbap.

Mosegât den kâtik zo bonjângât dâpjâ.

10 ¹ Den kâtik Mosejâ sâm muyageip, zo bonjâ bet muyagibap, zorat mân sâip. Buñâ. Zorat dâp hânân muyageip, zorat op sâip. Zo bonjâ buñâ. Zorat op ko tirik namâ galem a, zen den kâtik zo lum kendonjâ kendonjâ Kembangât singi nalem om ka om gane ma Anutu mâte okjângâme. Zen âlip mân um hâlâlu minzingâmap. ² Yatâ oi sâi Kembangât singi kut jâi jâi uujâ, zo buj opap. Zoren Anutu mâte okjângâme, zengât tosa buj oi sâi tosazijangât nanjâ kwâkâ dum mân upe. ³ Kembangât singi uujâ, zo kendonjâ kendonjâ muyagei tosazijangât nanjângâme. ⁴ Nonij makau gilâm-jâ, zorân dap op tosazij gulipkubap? Zo buñâ.

⁵ Zorat Kristonjâ hânân gibam Ibâgâren den itâ sâip,

“Kut jâi jâi gâgât singi ume, zorat mân otgimap. Sâk ko muyagem nigat.

⁶ A zij umzij mân kubikangâm zuu kâmbâk, zo kâmbukjâ uujâ sot

bâliņangât tosa buņ upapkât kut ñâi utnetâ gâ zorat nâņgâna mân dâp uap. ⁷Zo nâņgâm itâ sâwan, ‘O Anutu, sâtka lubam gewan. Kembangât ekabân nâgât den kulemguwe, zorat dâp muyagenibap.’”

⁸Den itâ sâip, zo ziap, “Kembu, gâgât siņgi nalem uuņâ sot zuu kâmbâk bâliņangât tosa buņ upapkât pâpan, zorat mân otgimap. Zorat âkongimap.” ⁹Oi den ñâi itâ târokwap sâip. “O Anutu, gâgât den lubam gewan.” Yatâ sâmnâ kut ñâi sâņgiņâ kâbakņem uņakņâ ñâi kwânâņgip. ¹⁰Zorat Anutugât dengât opņâ Yesu Kristo sâkņandâ suupniņ mei um salek urâwen. Zo sâp kânok oip, zorat zinziņ kâtikņâ ziap.

Yesu zâk neņgât suup meip.

¹¹Tirik namâ galem a, zen sirâmņâ sirâmņâ nepziņ tuum Kembangât siņgi nalem om ka om op ândime. Oi zo tosa âlip mân gulipkumap. ¹²Kristoņâ bâliņangât suup sâp kânok mei âki u Anutugât âsan bongen zarip, ândiap. ¹³Oi zâk zoren kâsarâpņâ kiņangât kombâņ upigât mambât ândiap. ¹⁴Um hâlâlu orotņangât mâtâp ândimen, neņgât umniņ sâp kânok memņâ kubikkubikniņangât nep tuum naņgip. ¹⁵Oi Tirik Kaapumņâ den sapsum niņgâmap. Den itâ sâi ziap,

¹⁶“Kembuņâ den sap, zo itâ, ‘Nâ dinnâ kâtikņâ umziņan pa geibap. Oi umziņan kulemgua zimbap.’”

¹⁷Oi den ñâi itâ târokwâip,

“Nâ tosaziņ birâbat. Bâliņâziņangât dum mân nâņgâbat.”

¹⁸Tosaniņ buņ oi zorat Kembangât siņgi noniņ makau kom uuņâ zo buņ upap.

Sarâņâ buņ Anutu mâte okņangânat.

¹⁹Bukurâp, Yesu zâk gilâmņandâ mâtâp mem niņgipkât nen hâlâlu namin zâinam umniņ bâbâlaņ uap. Yesugât op tirik namâ umņâ ñâi, hâlâlu kâtik sâme, zoren âlip baginat. ²⁰Yesu zâk zorat mâtâp uņak, zo muyageniņgip. Zâk zikņak ândiândiņ uņakņâ muyagem niņgip. Zâk sâņgum kom mânâmânâņgât zo walâm umņâ ñâi, zorat hâlâlu kâtik sâme, zoren bageip. ²¹Zâkņâ Anutugât tirik namâ bonņâ zorat galem a ândiap. ²²Zorat nen nâņgâm pâlâtâņ kwâkņangâm um hâlâlu sot um bâbâlaņ op mâte okņangânat. Zo umniņâ tosaņâ sumunkoip, zo gilâmņandâ saņgori salekkoi sâkniņâ too salekņâ saņgori mâte okņangânat. ²³Oi sâi kâtikkâtigiņandâ kut ñâi siņgi kwatniņgipkât siņgi den zorik mem ândim kâtiginat. ²⁴Oi galem orangâm buku orot nep sot nep âlipkât esapagom kin nep tuunat. ²⁵Oi a nâmbutņâ siņgi âlipkât minduminduyân mân game, nen yatâ mân op zâimânat. Narâk patâ mâte otniņgap. Zo yatâ nâņgâm kâtigemņâ tânagom kinat.

Bâliņangât nâņgâm bâbâlaņ orot, zorat den.

²⁶Nen den bonņandâ umniņan âsagei bâliņâ bâbâlaņâk oindâ zorat nâiņâ suup mei gulipkubap? Buņâ. Yatâ mân ziap. ²⁷Zo ko zo yatâ oindâ

sâi ko hâuñâ yâmbâtñâ sot kârâp patâ zorân mambâtningâm zembap. Kârâp zorânâ Kembangât sinji a kâsarâpziñ zo zinggesibap. ²⁸A nâiñâ Mosegât gurumin den zo nângâm kumbap, zo ko a zagât mo karâmbut, ziñâ tosanâ sâm muyagine a ambân ziñâ a zo tosanangât kune mumbap. Zo yatâ upme. Mân birâbigât sâsân. ²⁹Oi a nâi, zâk Anutugât nanñâ mem ge kwâkwat okñangâbap, zâk hâuñâ mimbap. Târotârô uñakñangât gilâm zorat nâñgi yenñâ opmap, zâk hâuñâ patâ mimbap. Oi nâi zâk buku orot mariñâ, Kembangât Kaapum sâm bâliñ kwâpap, zâk hâuñâ walâwalân mimbap sâmen.

³⁰Anutugât topñâ nângâmen. Zâkñâ den mâtâp nâi itâ sâi ziap,
 “Tosagât hâuñâ zingâziñgân, zo nâgât nep. Hâuñâ mâkâmâkân, zo nâñâ upat.”

Oi Kembangât den nâi itâ ziap,
 “Kembu nâ arâpnangât den sâm kwâkâbat.”

³¹Zorat itâ nângânâ, “Anutu ândiândiñ, zâkkât bikñan âiâiñ, zo yâmbâtñâ.”

Sinji âlip mem birâ mân utnat.

³²Zen mârum kut nâi opmarâwe, zo nângâbi. Narâk zoren sinji âlip gâi umziñâ hanşâi sâknam kwâkñan ândim sâknam nep tuum kâtigiwe. ³³Narâk nâin nâmbutñâ zen a mâteziñan diizingâm mem nâi nâi otziñgâm sâknam zingâm sâm bâliñ kwatziñgâwe. Oi zengâren gâbâ nâmbutñâ zen bukurâpziñâ yatâ otziñgâne sâknam ârândân nângâwe. ³⁴Zen bukurâpziñâ tâk namin zâine zengât op umbâlâ urâwe. Oi kât sikum betziñan mine sikum bonñâ zinziñâ kâtik zo nengât sinji sumbemân pâi ziap sâm, nângâne âlip oip.

³⁵Oi um bâbâlañ op kâtigem ândim zâkkâren sângân patâ mimbi.

³⁶Zorat zen kâtigem Anutugât den lum ândim, Anutu zâk kut nâi sinji kwatziñgip, zorat bonñâ mimbi. ³⁷Kembangât ekabân den nâi itâ ziap,
 “Zorat narâkñâ pânkânok ziap. zo âki gâbapkât sâsânâ, zo mân tap nângâm kek gâbap.”

³⁸Oi den nâi itâ ziap,

“A âlipnandâ nângâm pâlâtângât op ândiândi mimbi. Ka a zen loribi oi ko zengât nânga mân dâp upap.”

³⁹Nen ko lorem tâmbetagoagonan âiâiñ, zorat sinji buñâ. Nen nângâm pâlâtân kwâkñangindâ um dâpniñ hâlâlu zimbap, zorat sinji.

Nângâm pâlâtângât den.

11 ¹Kut nâi sinji kwatniñgip, zorat nângâm um bâbâlañ op mambât ândiândiñ, zorânâ nângâm pâlâtân uap. Kut nâi nâi mân igikñâ umñâ angân kârâm mem ândiândiñ, zorânâ nângâm pâlâtân uap.
²Kembangât sinji a sângiñâ, zen nângâm pâlâtânziñoot ândine Anutuñâ

ziŋgiri âlip oip. ³Hân sumbem zo Anutugât sâtâkât muyageip. Zo nâŋgâm pâlâtâŋ sot ândim nâŋgâm kwâtâtimen. Kut ŋâi ŋâi igikŋâ, zo mân igikŋan gâbâ muyageip.

Abe sot Enoko sot Noa, zengât den.

⁴Abenâ Kembu nâŋgâm pâlâtâŋ kwâkŋangâm ândim Anutugât ŋiŋi râma kom oi sei Anutuŋâ egi âlip oip. Âtânâ Kain ko nalem Kembugât ŋiŋi om pâi Anutuŋâ birip. Abe zâk nâŋgâm pâlâtâŋŋangât Anutuŋâ egi a âlipŋâ oi nalem zâkkât ŋiŋi oip, zo mem Abegât a târârakŋâ sâip. Abe zâk nâŋgâm pâlâtâŋŋoot ândeipkât nâŋga mumuŋandâ mâtâp âlipŋâ tirâpnâŋgoi ziap.

⁵Henok zâk Kembu nâŋgâm pâlâtâŋ kwâkŋangâm ândeip. Zorat mumuŋan mân âibapkât Anutuŋâ gwâlâ mem zari a ziŋ kâruiwe. Oi mân mem zarip, narâk zoren Anutuŋâ Henokât topŋâ itâ sâm muyageip, “Henok eksa âlip uap.” ⁶Mân nâŋgâm pâlâtâŋ kwâkŋangâm ândeindâ Anutuŋâ ŋiŋgiri âlip orot, zo mân taap. Ŋâi zâk Anutu mâte okŋangâbap, zâk kândom itâ nâŋgâbap, “Anutu ândiap. Oi Anutu mâte okŋangâm konsâm ândibi, zen bonŋâ muyagem ziŋgâbap.”

⁷Noa zâk Kembu nâŋgâm pâlâtâŋ kwâkŋangâm ândeipkât kut ŋâi bet âsagibap, zorat Anutuŋâ den kânŋan dukuip. Dukui Noaŋâ hurat kwâkŋangâm zikŋâ sot ambâ murarâpŋâ gwâlâ ândibigât wangâ tuugip. Yatâ oi a nâmbutŋâ, bâliŋ mame a zengât topziŋ muyageip. Oi Kembu nâŋgâm pâlâtâŋ kwâkŋangâm ândeipkât tosa buŋ orot, zorat bonŋâ meip.

Abaram.

⁸Abaram zâk Kembu nâŋgâm pâlâtâŋ kwâkŋangâm ândeipkât hânŋâ birâm ŋâi galem upapkât diŋâ muyagei lugip. Oi hân zorat mo zorat sâip, zo mân nâŋgâm sât lulu op lum arip. ⁹Kembu nâŋgâm pâlâtâŋ kwâkŋangâm ândeipkât hân ŋiŋi kwâkŋangip, zoren âimŋâ kwande ândeip. Zoren ândim hâmbâ silebân tâtat mâme oip. Hân zo Isaka sot Yakobo, zekât ârândâŋ ŋiŋi kwatzikip. Oi zet zo yatik urâwet.

¹⁰Abaram zâk kamân ŋâi zinzij kâtikŋâ Anutuŋâ muyageip, zorat nâŋgânâŋgâyâk ândeip. ¹¹Sera, zâk zo yatik Kembu nâŋgâm pâlâtâŋ kwâkŋangâm ândimŋâ ambân sombâ ândim imbaŋâ muyagem kâmbonâ oip. Kiungât ŋiŋi kwâkŋangip, zâkkât diŋangât nâŋgi bon oip. ¹²Zorat a sombâ op imbaŋâ buŋ oi zâkkâren gâbâ kiun donbep muyagiwe. Kiurâp zo sumbemân sâŋgelak tap arie, tengâziŋ zorat dâp oip. Oi saru sâtŋan sak ziap, zo aŋâ mân sâlâsâlâpkuŋ, zorat dâp muyagiwe.

¹³A zo, ziŋâ Kembu nâŋgâm pâlâtâŋ kwâkŋangâm ândim mom nâŋgâwe. Kut ŋâi ŋâi ŋiŋi kwatziŋgip, zorat bonŋâ mân memŋâ âkŋan ândi zei ekŋâ mâtâsem ândiwe. Yatâ opŋâ topziŋâ itâ nâŋgâwe, “Nen hânân yen kwande ândien.” ¹⁴Den yatâ sâm hân kâuk ŋâi muyaginam nâŋgâm ândiwe. ¹⁵Oi

ziinjâ mirâ kamân kândâtkuwe, zorat nângâ kwâkâ mân urâwe. Zorat otzĩngi sâi âburinâ sâm âlip âburibe. ¹⁶ Zen mirâ kamân n̄aigât âkñâle urâwe. Mirâ kamân âlipn̄a n̄ai sumbemân ziap, zorat âkñâliwe. Yatâ urâwe, zorat op Anutuñâ, zâk zengât Anutu, zâkkât yatâ sâindâ n̄angi mân bâlinj opmap. Wangât Anutu, zâk zikñak kamân patâ n̄ai muyagem zengât singi sâip, zorat.

Isaka sot Yakobo.

¹⁷ Abaram zâk Anutuñâ m̄asiki n̄angâm pâlâtân kwâkñangâm ândeipkât nanñâ Isaka Kembangât singi sâm kumbam oip. Abaram zâk singi den memñâ nan kânok zo buj upapkât Anutugât sâtñâ lugip. ¹⁸ Anutuñâ m̄arum Abaram itâ sâm dukui, “Isakagâren gâbâ kiurâpkâ âsagem lanj kârâm ândibi.” ¹⁹ Abaramñâ itâ sâm nanñâ kumbam oip, “Anutu zâk a mumujan gâbâ m̄angizĩngâbapkât imbanñâ zemñangap.” Yatâ sâipkât nanñâ mumujan gâbâ yatâ m̄aburem pindip.

²⁰ Isaka zâk Anutu n̄angâm pâlâtân kwâkñangâm ândimñâ imbanñâ mem Yakobo sot Esau m̄asop minzikâm kut n̄ai bet muyagibap, zorat den kânñan dâzâkoip. ²¹ Yakobo zâk yatik Kembu n̄angâm pâlâtân kwâkñangâm ândeipkât mumbam op Yosepe nanzatñâ m̄asop minzikip. Zâk tãññâ gâsum pindĩnsâm tap Anutu m̄apâsemñâ m̄asop minzikip. ²² Yosepe zâk Kembu n̄angâm pâlâtân kwâkñangâm ândeipkât mumbapkât narâkn̄a m̄ate oi Isirae a zen bet Aigita hân birâm âibi, zorat n̄angâmñâ sinjĩññâ mem âibigât den kânñan dâzângoip.

Mose sot Yosua.

²³ Mose muyagei ibâ mamñâ zet Kembu n̄angâm pâlâtân kwâkñangâm ândiwetkât egitâ âlip oi a kutâgât den zorat mân kengât op kâin karâmbut katep tik pâitâ zeip.

²⁴ Mose zâk lâmbatñâ Kembu n̄angâm pâlâtân kwâkñangâm ândeipkât a kutâ Parao b̄aratñangât nanñangâren singi sânat sâne kwâkâziñgip. ²⁵ Zâk Anutugât a ambân gakârâp zen sot umbâlâ sot sâknam n̄angâbapkât sâlâpagoip. Zâk Aigitâ a osetziñan ândim narâk pãñkânok um sâkkât âkñâle bâlinjâ zo lum sâtâre upapkât n̄angi mân dâp oip. ²⁶ Oi Aigitâ hânân gâbâ kât sikum zorat n̄angi gigiñj oip. Oi Kembuñâ a bâlinjan gâbâ m̄akâniñgâbapkât sâsân, zâk yatik sâknam n̄angâm ândibapkât n̄angi bon oip. Zo gâtâm sãngân mimbapkât yatâ n̄angâm oip.

²⁷ Zâk Kembu n̄angâm pâlâtân kwâkñangâm ândeipkât a kutâ kukñâ zorat kengât mân op Aigita hân birip. Oi Anutu mân igikñâ, zo senñâ ekñâ yatâ zâkkâren pâlâtân oip. ²⁸ Mose zâk Kembu n̄angâm pâlâtân kwâkñangâm ândeipkât sâi sumbem a kâwaliñoot zâk mân zãngobapkât Pasowa kendonân râma kom gaam gilãmñandâ mirâ hãngiyân sanjorâwe. Sumbem a kâwaliñoot zorân murarâpziñj, kãndom kãtep, zo tãmbetzãngobam ga ekñâ walãziñgip.

²⁹Oi Isirae a zen Kembu nângâm pâlâtân kwâkņangâm ândiwegât saru kuriņan mâtâp âsagei lâņ âiwe. Aigitâ a ziņ yatâ utnâ sâne saruņâ gwâkâziņgip.

³⁰Isirae a zen Kembu nângâm pâlâtân kwâkņangâm ândiwegât Yeriko kamânân paņ patâ kirip, zo haamgum âinetâ sirâm nâmburân zagât âki amuņ gei giligâlaksâip. ³¹Mâtâp ambân Rahaba, zâk Kembugâren nângâm pâlâtân kwâkņangâm ândeipkât Isirae a hân ek mânâņgârâwet, zet buku otzikip. Yatâ oipkât den kwâkâ a zen sot mân kuwe.

Kembugât a nâmbutņâ, zeņgât den.

³²Den kêrep mân târokwap sâbat. Gideoņ, Barak, Simsoņ, Yepita, Dawidi sot Samue sot Propete a nâmbutņâ zeņgât den sâm arindâ sâi kêrep opap. ³³Zen aksik Kembu nângâm pâlâtân kwâkņangâm ândiwegât a kâmut patâ mem ge kwatziņgâwe. Kubikkubik nep tuum biraņâwe. Kut ņâi ņâi siņgi kwatziņgip, zorat bonņâ miwe. Zuu kâtik Laioņ lâuziņ dooņguwe. ³⁴Kârâp kâligen zâmbane Anutuņâ mem sândukņan kwatziņgip. Aņâ sâuņâ kârâziņgânâ sâne kâtigem ândiwe. Lolot ândiweņâ imbaņâ mem ândiwe. Kâmbamân a kâwaliziņoot ândiwe. Hân torengen kâsaziņ zâņgom moliziņgâm ândiwe. ³⁵Ambân nâmbut zeņgât narâpziņâ mumuņan gâbâ zaatne galem otziņgâwe. A nâmbutņâ a ziņ sâknam kwatziņgâm mem ņâi ņâi otziņgâwe. Oi siņgi âlip birâne mân zâņgonat sâne ândiândi kâtikņan zaatpigât nângâm den zo birâwe.

³⁶A nâmbutņâ a ziņ den bâliņ top top sâm dâzâņgom lapitziņgâwe. Oi nâmbutņâ kin bitziņ saam tâk namin zâmbarâwe. ³⁷Nâmbutņâ kâtņâ zâņgowe. Nâmbutņâ nak gaañâ gaaziņgâwe. Nâmbutņâ kâmbamņâ zâņgom gânduziņ mânâņgârâwe. Nâmbutņâ kanpitâ ândim noniņ râma sâkņâ akum ândiwe. Mandu yatâ op sâknam kwâkņan ândiwe. ³⁸Hân a nâmbutņâ ândiwe, zeņgât dâp mân ândiwe. Zen a âlipņâ. Zen mirâ kamân kâtikņan sot barâ kâtikņan ândiwe. Kât kiyân sot hân mâtâpņan ândiwe.

³⁹Zo zen aksik Anutu nângâm pâlâtân kwâkņangâwegât Anutuņâ ziņgiri âlip oip. Oi kut ņâi siņgi kwatziņgip, zorat bonņâ mân muyagiwe. ⁴⁰Topņâ itâgât. Anutu zâk neņgâren kut ņâi zâizâiņ pâmbapkât nâņgi zeip. Zorat nen buņan ândiândi âlip ândibigât mân nâņgâziņgip.

Yesu zâk kândom otniņgipkât zâk wâratkum kâtiginat.

12 ¹A sâņgiņâ kâmut patâ yatâ zoraņ haamnâņgom niņgit tegât kut ņâi yâmbât sot bâliņangât tâkņâ kâpinâņgomap, zo mânâņgât birânat. Oi mâtâp tirâpnâņgowe, zorik âkonņâ buņ sârârâk kârâm âim kikerân takânat. ²Oi Yesu, nâņgâm pâlâtânġât mariņâ sot bon muyamuyage, zâkkâren sen kwap ândinat. Zâk sâtâre muyagibapkât sâsâņâ, zorat nâņgâm poru nagân sâknam nâņgâm moip. Oi zorat aņun kwâkņan zari nâņgi yenņâ oip. Yatâ

opnâ Anutu, imbanjâ mariņâ, zâkkât âsan bongen zarip, ândiap. ³Bâliņ mâme zen kâsa okņangâm mem nâi nâi okņangâne nâņgâm tâtâlîm kâtigeip. Zen ko umziņ loribegât zâkkât nâņgâmņâ âkonņâ buņ kâtigibi.

Anutuņâ kubikņingâmap, zorat den.

⁴Zen bâliņandâ lotņan kwatziņgâbâ sâi kâtigem um sâkziņ kubikņangâm kinkin, zo yatâ op ândiwe. Ka bâliņandâ kâtigem tâmbetzâņgobat sâi ko dap upi?

⁵Anutuņâ narâpņâ zâņgonsâm itâ sâip. Den zo nelâmzâņguap? Den zo itâ sâip,

“Nannâ, Kembuņâ kubikgigi nâņgâna mân giginjâ upap. Kubikgigi umgâ mân loribap. ⁶Anutu zâk a umņâ gâsuziņgâm zengât narâpnâ sâmap, zen zâņgom kubikziņgâmap.”

⁷Zorat op ko Kembuņâ kubikziņgâbam sâi mân keņgât upi. Anutu zâk ziņgiri nan bârarâp utne yatâ otziņgâmap. Zengâren ibârâpziņandâ yatik narâpziņ kubikziņgâme. ⁸Anutuņâ zen kubikziņgâmap. Mân kubikziņgi sâi ko lanjân gâbâ âsagiwe sâbem. ⁹Oi nâi sâbâ. Hânân ibârâpniņ zen nâņgom kubikņingâne dinziņâ lum hurat kwatziņgâmen. Oi sumbem mariņâ, um dâpniņangât Ibâ, zâk yatik hurat kwâkņangâm ândeindâ dâp upap. Yatâ op ândim, ândim kwâtâtinat. ¹⁰Hânân ibârâpniņ ziņ narâk pâņkânok âkņâlezziņâ dâp nâņgom kubikņingâme. Sumbem Ibâniņandâ ko âlip op ândinatkat kubikņingâmap. Zikņâ hâlâlu ândiândiyân târokwatnatkat opmap. ¹¹Kubikkubik muyagibap dâp, zo nâņgindâ umâlip mân oi sâknam nâņgâmen. Oi bet ko kubikkubigân ândim kâtigimen, nengâren bonņâ muyagemap. Kubikkubikkât bonņâ zo târârak ândiândiņ sot um lumbeņâ.

Kâwali muyagem tânagobi.

¹²Zorat zen bitziņâ lolot sot pabutziņ bâliņâ zo kubikņâ kâtigibi. ¹³Oi kinziņ lâņbigât mâtâp zo kubikņâ zengâren pabutziņ bâliņâ zo âlip oi lâņ âlip upi.

¹⁴Zen a aksik patâ zen sot lumbe ândiândiņangât nep tuubi. Oi um hâlâlu op ândibigât kâtigibi. Um sumun sot ândim Kembu igikņâ, zo mân ziap. ¹⁵Zengâren gâbâ nâiņâ Anutugât tânzâņgozâņgoņ, zo walâbapkat galem oraņgâm ândibi. Oi osetziņan um kâlak dengât kârâpņandâ ziņgesebapkat galem oraņgâm ândibi. ¹⁶Oi zengâren gâbâ nâiņâ Esaugât mâtâbân lâņ lâņ ândiândiņ sot a hurat mân kwâkwat mân upap. Esau zâk nalem kânok zorarâk op kândom âsaâsagiņangât bet sâwât zo birip. ¹⁷Zen zâkkât nâņgâme. Zâk bet mâsop mimbâ sâi aņgân kârip. Kut nâi oip, zorat isem umbâlâ op um melâņmelâņņangât mâtâp mân muyageip.

Nen Sinai bakņâ buņâ, Sioņ bakņâ mâte urâwen.

¹⁸Narâk ziren zen bakņâ nâi gâsum mâsâsuatme. Kârâpņoot, zoren mân âiwe. Oi nâttâtikņâ, sasa sot pibâ zorat umņan mân bagiwe. ¹⁹Oi

lâmun diŋâ patâ sot den kwamit patâ zo mân nâŋgâwe. Mârum ko sâkurâpziŋâ mirâ kamân kâतिकŋan ândim den zo hiriŋsâbapkât ninâu sâwe. ²⁰Den itâ muyageip, zorat nâŋgâne imbaŋâ oip, “A mo zuu ŋâiŋâ bakŋâ zo lâŋji kâtiŋâ kune mumbap.” ²¹Kut ŋâi zo sânmâ kwâtkwâtŋoot muyagei Moseŋâ sâip, “Nâ keŋgât op sânmânmâ sâmbuap.”

²²Mârum yatâ âsageip. Narâk zi ko zen bakŋâ yatâ zoren buŋâ. Zen Sioŋ bakŋâ, Anutu ândiândiŋ, zâkkât kamân patin sumbemân, Yerusalem kamân uŋakŋan ga giwe. Oi sumbem a doŋbep, a mân sâlâpziŋgôzâŋgoŋ sot sâtâre mindumindu patâ. ²³Anutugât narâpŋâ kutziŋ sumbemân kulemgoi ziap, zen mâte otziŋgâwe. Oi a aksik patâ neŋgât den sâm kwâkâkwâkân a patâ, Anutu sot a hâlâlû minziŋip, zeŋgât um dâpziŋâ, zeŋgâren târokwarâwe. ²⁴Oi Yesu târotâro uŋakŋaŋgât nakŋâ, zâkkâren gamŋâ gilâm saŋgonsaŋgon mâte urâwen. Gilâm zorâŋ Abegât gilâmŋâ tosa sâm muyageip, zo yatâ buŋâ. Yesugât gilâm zorâŋâ saŋgoniŋgâbapkât geip.

Anutuŋâ hân sot sumbem mâŋgizikâbap.

²⁵Zen den dâzâŋgobap, zo zâk kândâtkubegât galem oraŋgâm ândibi. Mârumŋan hânân ge Sinai bâkŋan gâbâ sâkurâpziŋâ den dâzâŋgoi birâne hâuŋâ muyageziŋip. Zi sumbemân ândim den dâtnâŋgomap, zâk kândâtkom dap yatâ hâuŋâ buŋ ândinat? ²⁶Anutuŋâ Sinai bâkŋan den sâi diŋandâ hân mâŋgeip. Oi zi ko du âsagibapkât sâm kâtiŋgeip. Anutuŋâ itâ sâip,

“Nâ narâk ŋâin dum hân mâŋgimŋâ sumbem ârândânŋ mâŋgibat.”

²⁷Dum mâŋgibat sâip, zo ko kut ŋâi ŋâi muyageip, zo mâŋgei buŋ upapkât nâŋgâm sâip. Buŋ oi zinzij kâtik zo muyagem yen zimbi.

²⁸Nen Anutugât um topŋan ândinatkât siŋgi kwatningip, zo zinzij kâतिकŋâ. Zo minat, zorat Anutu sâtâre okŋaŋgânat. Oi pindiŋsâm hurat kwâkŋaŋgâm keŋgât op mâpâsinat. ²⁹Wangât, Anutuniŋâ, zâk kârâp patâ yatâ, zorat op ko. Kârâpŋâ kut ŋâi ŋâi bâliŋâ sem naŋgâbap, zorat san.

Um den.

13 ¹Buku oraŋgâm ândime, zo zen mân birâne gibap. ²A hân ŋâin gâbâ gane ziŋgit mân nâŋgânâŋgâ mân upi. Mârumŋan a ganetâ buku otziŋgânâ sâm topziŋ mân nâŋgâm sumbem a buku otziŋgâwe.

³Bukurâpziŋ tâk namin zâmbarâwe, zeŋgât nâŋgâm, nâŋgâne ârândânŋ ândien yatâ upap. Oi zen sâk sot ândiegât bukurâpziŋ a ziŋ zâŋgone sâknam kwâkŋan ândime, zeŋgât nâŋgâm ândibi.

⁴Ap ambin ândiândiŋ, zorat nâŋgâne bon oi mân mem bâliŋ kwapi. Oi itâ nâŋgâm ândibi. Laŋ ândim târotâro mânâŋgât ândime, zen Anutuŋâ hâuŋâ ziŋgâbap.

⁵Umziŋandâ kât sikumgât âkŋâle mân upap. Oi kut ŋâi ŋâi tatgigap, zorat mân sâm mem ândiban. Kembu zâk itâ sâip, “Nâ mân birâgibat. Oi gek mân nâŋgânâŋgâ mân upat.” ⁶Zorat nen um bâbâlaŋâk itâ sânat,

“Kembu zâk betnan memap. Zorat a ziŋ kâsa otnim yatâ mo yatâ otninâ sâne mân kenŋât upat.”

Siŋgi âlip kwâkâm niŋgâwe, zo mem ândim Yesu molinat.

7A sâtŋâ gakâziŋ Anutugât den dâzâŋgom ândiwe, zengât nâŋgâm ândibi. Zen mâtâp âlip lâŋ ândim muwe. Mâtâp zorik ekŋâ molizingâm Kembugâren nâŋgâm pâlâtâŋ kwâkŋangâm ândinat.

8 Yesu Kristo, zâk ândeipŋâ ândiap, zo yatik ândim zâimâmbap, kâtikŋâ.

9A ziŋ den uŋakŋâ top top dâzâŋgone zorâŋâ umziŋ mân gulipkubap. Umziŋan Anutugâren gâbâ tânzâŋgozâŋgoŋandâ tângui kâtigem kiri âlip upap. Kut ŋâi ŋâi niniŋandâ mân mem tângubap. Anâ mâtâp zo lâŋgâwe, zen bonŋâ mân muyagiwe. 10Nengâren Kembugât siŋgi naleŋm pâpanŋâ taap. Zo hâmbâ silep galem upme, ziŋ nimbîgât mân sâsâŋâ. 11Zen nâŋgâme. Zuu kom gaamŋâ gilâmziŋ tirik namâ galem a patâŋâ bâliŋangât toŋagât namin mem zari bonŋâ kamân kândâtŋan mem gei kârâbân ume. 12Zo yatik Yesu zâk gilâmŋandâ a um hâlâlû miningâbapkât kamân kândâtŋan kune moip. 13Zorat nen yatik kamân kândâtŋan zâkkâren giarindâ zâkkât op yatik bâliŋ otningâbi. 14Itâ nâŋgâm utnat. “Kamân zinziŋ kâtikŋâ ziren mân taap. Nen kamân kâtikŋan, zinziŋ kâtik zimbap, zorat nâŋgâm mambât ândien.” 15Zorat nen Yesu sot pâlâtâŋ opŋâ târotâroniŋangât opŋâ Anutu mâpâseindâ zorâŋ tâbaniŋ upap. Zâk hurat kwâkŋangâm ândim lâuniŋandâ sâm sâtâre okŋangânat. Kutŋâ sâm bâbâlân kwâkŋangânat.

Ninâu sâm betniŋan mimbi.

16Orot mâme âlipŋâ utnam gulip mân upi. Anutu zâk zorat nâŋgi zâkkât siŋgi kut ŋâi ŋâi pame, zo yatâ utne bonŋâ upap.

17A sâtŋâ gakârâpziŋ, zengât sâtziŋ lubi. Zen um dâpziŋ galem upmeŋâ nepziŋangât topŋâ Anutu mâteŋan sâm muyagibi. Zorat nepziŋ umâlibân tuune dâp upap. Umbâlâyân tuune zengâren kut ŋâi âlipŋâ mân upap.

18Zen nengât op ninâu sâm ândibi. Nen umniŋan tosa kârum ândimen. Kut ŋâi ŋâi utnam oindâ târârâk upapkât otningâmap. 19Ninâuŋâ betnan mine Kembuŋâ melâŋnigi zengâren kek gâbatkât dâzâŋguan.

20Lumbenangât mariŋâ, Anutu, zâk râma galem a patâ Kembuniŋ Yesu târotâro zinziŋ kâtik zorat gilâmngât mumuŋan gâbâ mâŋgei zarip. 21Anutu zâk imbaŋâ sot kâwali ziŋgâmŋâ mem bâbâlaŋ kwatziŋgi diŋâ lum nepŋâ tuum kwâtâtibi. Oi zikŋak nâŋgi dâp opmap, zo Yesu Kristogât opŋâ zengâren muyagibap. Zâkkâren sâm âlip kâtikŋâ zem zâimâmbap, zo perâkŋak.

22Bukurâp, den kârep ŋâi mân kulemgum ziŋgan. Oi zen den girem zo nâŋgâne mân bâliŋâ upapkât sâm ziŋgan. 23Oi nâ dâzâŋgua nâŋgâne. Bukuniŋâ Timoteo, zâk tâk namin gâbâ olaŋawe. Oi zâk kek gâbap oi ko zâk sot gârat.

²⁴A sâtnâ gakârâpziŋ sot Kembangât siŋgi a ambân aksik nâŋgâziŋgan.
Italia hânân ândie, zen yatik nâŋgâziŋge.

²⁵Kembangâren gâbâ tânzâŋgozâŋgoŋâ aksik zeŋgâren zimhap.
Zo yatik.